

Txirritola

ARAMAIO / Barikua / 2003ko maiatzaren 9a / 63. zenbakia

KOORDINATZAILEA: Ubane Madera • Otolara Lizentziaduna 31 20500 ARRASATE • Tel.: 943 71 25 11 • Faxa: 943 71 23 89 • Posta elektronikoa: txirritola@goiena.com • Lege gordailua: SS.1084/02

Herriko Udalak eguneroko jardunarekin jarraituko du

UBANE MADERA

Hauteskundeak datozela-eta, zenbait herritarrek kezka dute ea Udalean eguneroko jardunarekin segituko ote duten edo ez. Izan ere, zenbaitetan lana eten egiten dute.

Kontua da zinegotziei-eta lana pilatu egiten zaiela hauteskunde garaian eta udal batzuetan euren lana eten egiten dutela bestelakoa egin ahal izateko.

Kasu honetan, Aramaion, lasai egon daitezke herritarrak. Izan ere, batzorde guztiek lanean jarraitzea erabaki dute.

Hirigintza batzordeak, adibidez, martitzenean egin zuen hori erabakitzeke batzarra. Eta erabaki zuten datorren ekainaren 10era arte lanean jarraituko dutela, ordura arte Iñaki Nafarratek alkate izaten jarraituko du-eta.

Horrela, bada, Hirigintza batzordean abian dauden proiektuek aurrera egingo dute eta jendeak eskatzen dituen lizentziak ematen jarraituko dute.

ZERBITZUAK, EUSKARA ETA KULTURA

Eta gainerako hiru batzordeek ere gauza bera egingo dute: Zerbitzu batzordeko kide Joxe Goronaetak esan digunez, ahal dena bukatu-



Ekainaren 10era arte lanean jarraituko dute Udaleko batzordeak.

ta utziko dute, hurrengo datozenei lana errazteko. Lizentziei dagokienez, berriz, ahal dena aurreratzen dabilzala esan digu, baita lizentziaren bat eskatzeko asmoa duenak lehenbailehen eskatu behar duela ere.


Euskara batzordeko buru Amaia Axpek, berriz, zera esan digu: "Ahal dena arte lanean jarraituko dugu. Botatzen gaituzten arte".

Eta Kultura batzordeko buru Txema Abarrategik adierazi digu akaso batzordearen lana motel-

du egingo dela, baina hartutako konpromisoak bukatu egingo dituztela eta datozenei erantzuna ematen ahaleginduko direla.

OSOKO BILKURA

Era berean, hauteskundeak baino lehenago osoko bilkura izango dela iragarri digu Nagore Artamendi idazkariak; hain justu, zenbait gai erabakitzeke zinegotzi guztien parte-hartzea behar izaten delako. Hala, datorren maiatzaren 21ean izango da agintaldi honetako azkeneko bilkura.



Korrika batzordea, pozik

Apirilean euskararen aldeko Korrikak Euskal Herria zeharkatu zuen. Aramaiotik ez zen pasatu, baina aramaioar askok bat egin zuten, Korrikan bertan parte hartuz edo dirua emanez laguntzeko. Hain justu, herriko Korrika batzordeak jakinarazi du 931,1 euro batu dituztela herrian, eta eskerrak eman gura die parte hartu duten kultura taldeei, elkartei, herritarrei eta Udalari.

HERRITARREN HITZA / Asier Agirre • AHTren aurkako taldeko kidea

Demokrazia ustela

Hitz hauek idazterakoan nire amorrazioa islatu nahi nuke, ikusita euskal herritar askoren eskubideak zanpatuak direla. Euskal gizarteko zati baten aukera politikoak errespetatu ez eta mapa politikotik kanpo uzten dituzte. Momentu hauetan Aramaio herri plataforma (hAMAlau) eta AuB aukera politikotatik kentzen dizkigute. Zeren heldurra dute ba? Herritik sortu diren aukera horiei bidea galarazteko eta herrikoak ez diren beste batzuk etorri gure Udaletan muturrak sartzea. Gu bizi gara herri hauetan eta guk esango dugu nork bideratuko dituen gure instituzioak. Nik, behintzat, zilegi ikusten dut AuBren eskaera, banatuko dituzten boto-txarteekin bozka emanez;

eta espero dut herrietako plataformek ere boto-txartelak banatzea, gure bozka eman ahal izateko. Hauteskunde biharamunean ikusiko da herritarren aukera. Eta ikusiko da nolakoa den zenbait politikoren jarrera; eskubide guztiak guztionez eskatzen dituzten horiek besteon aukerak errespetatzen dituzten edo eurei estatu espainolak ematen dien legimitateak aprobetxatuz euren politrona-goseak aseko dituzten.

Izan ere, gure herriaren aurka dagoen gurutzadak herritar asko espetxera eraman



"Euskal Herria herri bat da Aturritik Ebroraino"

ditu eta beste asko klandestinitatera. Azkenaldian, gainera, ikusi dugu zenbat herri-mugimendu, alderdi politiko eta egunkari itxi edo euren legeetatik kanpo utzi dituzten. Euskal herritar garen heinean, gure legedia izatera bultzatu behar ditugu gure institu-

zioak, Euskal Herria herri bat delako Aturritik Ebroraino, eta herritar asko eta asko garelako hori nahi dugunak: herri izaera eduki eta bakean eta askatasunean bizi.

Udalbiltza egiten dabilen lana ikusita agintari espainolek taldeko kide batzuk atxilotu eta bulegoak ixtea erabaki dute, Udalbiltza joko kanpo uzteko. Gure lana da lan horrekin aurrera jarraitzea, gure herri izaera mantenduz eta aurrera eginez. Hor dago EHNA, euskal herritar garelako ziurtatzen duen agiri bakarra, euskaldun guztiok eduki beharrekoa. Horren harira, esan beharra dago txalogarria dela zenbait euskaldunek hartu duten jarrera: urte andana ihesean ibili eta gero etxera itzuli dira EHNA eskuan hartuta, tartean, Santi Iparragirre eskoriatzarra eta Mikel Piedehierro arrasatearra. Ongi etorri etxera.

LABUR

Antzerkia eta erakusketa Anboto tabernan

Gaur, barikua, musika kontzertua barik antzerkia ikusateko aukera egongo da Anboto tabernan. Hain zuzen, Las Torpedolevel taldeak *Las chicas serias no gustan* izeneko lana antzeztuko du, 21:30ean.

Bestalde, kultura ekimenak egiteko ohiturarekin jarraituz, datorren maiatzaren 16ra arte Idoia Elexpuruk egindako margolanak ikusgai eta salgai egongo dira Anboto tabernan. Aretxabaletarra da Idoia Elexpuru; batez ere, itsasoarekin lotutako paisaietan oinarritutako lanak ipini ditu Anbotoko erakusketan.

TELEFONO JAKINGARRIAK

OSASUNA / LARRIALDIAK

Osasun etxea (txandak)	945 44 53 40
Botika	945 44 50 03
Udaletxea	945 44 50 16
Ertzaintza (Arrasate)	943 79 71 99
Gurutze Gorria (Legutio)	945 45 52 52
San Martin Eskola	945 44 50 04
Taxia eta autobusak	945 44 50 33
Udal kiroldegia	945 44 53 35
Postetxea	945 44 50 83
Zulako Eskualdea	945 43 01 67
Suhiltzaileak (Zubillaga)	943 78 28 00

AUTOBUSORDUTEGIA

ARRASATE	ARAMAIO	GASTEIZ
07:00	07:15	08:00
10:00*	10:15	
11:00	11:15	
12:00*	12:15*	13:00
15:15	15:30	16:15
17:20	17:35	
18:30*	18:45	
20:30	20:45	21:25
21:00*	21:15	

GASTEIZ	ARAMAIO	ARRASATE
	07:50	08:05
08:15	09:00	09:15
	10:15*	10:30
	11:15	11:30
13:10	13:55	14:10
16:20	17:05	17:20
	17:35	17:50
	18:45*	19:00
19:30	20:00	20:15

OHARRA: izartxoan duten orduetan eskaeraren arabera zerbitzua eskaintzen dute. Auzoetako bizilagunei zuzendutakoa da, eta autobusa erabili gura badute, bezperan deitu beharko dute honako zenbaki honetara: 629 54 59 23

OHARRAK

ARAMAIOKO EUSKARA

Bihar, zapatua, *Aramaioko Euskara* liburua aurkeztuko dute kultura etxean. Txipi Ormaetxea irakasle arrasatearrak idatzi du liburua. 12:30ean izango da aurkezpen ekitaldia. Idazlearekin batera Udaleko ordezkariak ere egongo dira.

PILOTA PARTIDUAK

Lau t'erdiko Txapelketaren barruan, ETB Kantxa sariari dagozkion partiduak izango dira gaur, barikua, 21:15ean, pilotalekuan.

ARETO FUTBOLA

Bañerako neskendako atsedendaldirako garaia iritsi da. Azken partidua galdu zutela eta, txapelketatik kanporatuta geratu dira. Kadete mailako mutilek, berriz, Laudion izango dute bihar norgehiagoka, La Milagrosa taldearen kontra. Partidua 10:00etan hasiko da, La Granja kiroldegian. Eta gazte mailakoek etxean jokatu dute, 11:00etan, Cafeteria Atenearen kontra.

ZINEMA

Aventuras en Alaska filma emango dute.

GIZARTEA

Zabalik dago eskola garraiorako dirulaguntzak eskatzeko epea

Aramaioko Udalak jakinarazi digunez, eskola garraioa erabiltzen dutenendako aurtengo dirulaguntzak eskatzeko epea zabaldu dute. Hain justu ere, maiatzaren 23a baino lehen egin behar dira eskaerak.

Honako ikasketak egiten dabilzanek jaso ditzakete herriko Udalaren dirulaguntzok: Derrigorrezko Bigarren Hezkuntza (Arrasate-Aretxabaleta Institutuko ikasleek izan ezik); HSAOG (LOGSE); erdi eta goi mailako heziketa zikloak edo unibertsitate mailako ikasketak.

Dirulaguntzaren eskaerarekin batera, ikasketen matrikularen ziurtagiria edo matrikularen ordainagiria aurkeztu beharko du interesdunak.

Lehen esandako moduan, datorren maiatzaren 23a baino lehen egin behar dira dirulaguntza lortzeko eskaerak, Aramaioko udaletxearen bulegoan, hain zuzen ere.



BOTEPRONTOAN/ Susana Martínez · Oinarrizko Gizarte Zerbitzuetako langilea

“Aramaion eskaera handia dago; egunero dator jendea eta ia-ia ordu guztiak ditut okupatuta”

Susana Martínez Kintanakoa da, nahiz eta orain Gasteizen bizi den. Ia urtebete darama Aramaion lanean. Ordezkapena egiten hasi zen; gero lege berri bategatik erabaki zuten bi lagun ibili behar zirela Zuiako Koadrilako Oinarrizko Gizarte Zerbitzuetan lanean, eta lanean segitu zuen:

Orain berriro handitu dute zerbitzua, ezta?

Bai. Aramaiora eguaztenetan etortzeaz gain, orain barikutan ere etortzen naiz, 08:00etatik 12:00etara.

Nahikoa da ala sarriago etortzea komeniko litzateke?


Lehen baino askoz hobeto gaude, baina niri ez dagokit gehiago behar den edo ez esatea.

Aramaioz gain, beste herri batzuetan ere egiten duzu lan?

Arratzu-Ubarrundiara joaten naiz, apirilaren laz geroztik. Horrez gain, Legutianora eta han inguruko herrietara ere joaten naiz.

Zein zerbitzu eskaintzen duzu?

Oinarrizko Gizarte Zerbitzua da. Jende guztiari dago zuzenduta, gazte zein helduei, bikoteei zein bestelakoiei... Edozein zalantza izanez gero etor daiteke. Gure zerbitzuak Diputazioarekin harreman zuzena dauka eta haiei esker zerbitzu zehatzak



eskaintzen ditugu, eskaeraren arabera. Adibidez, hirugarren adinekoekin lan handia egiten dugu: batez ere, egoitzen gaine-ko informazioa eskatzen dute, baita etxer etxeko laguntza zerbitzua ere.

Zer egiten duzu etxer etxeko laguntzaren barruan?

Lehenik eta behin familia ezagutu behar izaten dugu. Horretarako, bisita egiten diogu, eta familiaren, etxebizitzaren eta familiaren egoeraren berri izaten dugu. Horren ondoren ebaluazioa egiten dugu, Foru Aldundiari gure proposamena egiteko. Eta Foru Aldundiak erabakitzen du zer egin behar dugun, zenbat orduz lan egin... bai pertsonekin lan egiteko orduan, baita etxeko lanak egiteko orduan ere.

Eta gazteei dagokienez, zein zerbitzu ematen duzue?

Edozein motatako arazoan gainean egin dezakegu berba: eskolako arazoak, gurasoekin dituzten arazoak, norik bere buruarekin dituen arazoak... Arazo horiek konpontzeko nora jo dezaketean esango diet nik, aholkulari moduan.

Aramaioren eskaera handia dago?

Bai. Oraindik ez dugu egin ikerketa zehatzik, baina egunero dator jendea eta ia-ia ordu guztiak ditut okupatuta.

Zeintzuk dira eskaera nagusiak?

Hirugarren adinekoekin eta elbarrituekin zerikusia dutenak. **Zureaz gain badago bestelako zerbitzurik?**

Gizarte zerbitzuaz gain Zuriñe teknikaria ere badago eta bi astean behin Koldo etortzen da (auzokideen aurrezaintzarako teknikaria). Hiruron artean nahiko zerbitzu zabal eskaintzen dugula uste dut.

Zer egin behar da zurekin egoteko?

Udaletxera deitu, eta hemen ez banago eurek esango dizute non nagoen.

Aramaion jendeak badu zuregana etortzeko ohiturarik?

Uste dut zerbitzua oso ezaguna dela; izan ere, herritarrekin lan egiteaz gain, elkarteekin ere harremanetan gaude.

“Foru Aldundiak erabakitzen du zer egin behar dugun, zenbat orduz lan egin behar dugun”

“Gazteekin edozein arazoan gainean egin dezakegu berba, eta gero aholkulari lanak egin”